



POJEDINAČNE NAPLATE
Bivši tehnički direktori:
 Elvedin Borovina (165.000 KM)
 Bakir Arslanagić (167.000 KM)
 Branimir Mijatović (103.000 KM)
 Harun Čatović (101.000 KM)
Direktor pravnog sektora
 Sead Talić (115.000 KM)

O
 "HIDROGRADNJI"
 SE RASPITIVAO
 FUP

SIPA ušla u
 "Hidrogradnju"
 u Sarajevu

Zgrada "Hidrogradnje" prodata za 11 miliona, menadžment od prodaje uzeo dva miliona KM
 FOTO N. UGLJEŠA

PRETRESI ZBOG DUBIOZE OD 100 MILIONA!

Od 100 miliona KM gubitka "Hidrogradnje", 40 miliona su dugovanja po osnovu plata i doprinosa radnicima

Mirsada LINGO-DEMIROVIĆ

SARAJEVO - Pripadnici Državne agencije za istrage i zaštitu (SIPA), po nalogu Tužilaštva Kantona Sarajevo, a na osnovu prijave Sindikata "Hidrogradnje", ušli su u prostori- je tog sarajevskog preduzeća, nekada najveće građevinske firme na prostoru bivše Jugoslavije.

Kako saznajemo, policajci su u "Hidrogradnji" u četvrtak boravili oko tri sata zbog, kako navode iz Sindikata, akumuliranog gubitka od 100 miliona KM i planskog uništavanja firme koja se nalazi pod stečajem.

Redžep Tufekčić, nekada predsjednik Sindikata radnika "Hidrogradnje", danas predsjednik Sindikata građevinara Kantona Sarajevo, kazao je u petak "Nezavisnim" da su radnici zadovoljniji što je konačno neko reagovao na njihove konstantne krivične prijave protiv menadžmenta firme, kao i sadašnjeg stečajnog upravnika Zijada Fazlagića.

"Prijava je pokrenuta i išlo se preko svih tužilaštava protiv većinskog vlasnika FBiH, članova



Upravnog odbora i Nadzornog odbora u "Hidrogradnji" za organizovani kriminal i pljačku "Hidrogradnje". Prijava je okvalifikovana kao punovažna i organi SIPA ne bi ušli u proces istrage da nemaju relevantne dokaze", kaže Tufekčić, koji tvrdi da su ga prije 20 dana iz Federalne uprave policije (FUP) kontaktirali i pozvali na saslušanje, te da su mu tada rekli da ne znaju hoće li to preuzeti SIPA ili FUP.

"Očekujem da će me pozvati. Imam sve papire, dokumentaciju koja će potvrditi da je u "Hidrogradnji" počinjen teški kriminal i da je SDA naložila prodaju zgrade po mnogo manjoj cijeni nego što je njena vrijednost", rekao je Tufekčić.

Inače, od 100 miliona KM akumuliranog gubitka "Hidrogradnje", 40 miliona su dugovanja po osnovu plata i doprinosa radnicima. U strukturi vlasništva Vlada FBiH učestvuje sa 67, a ostali dioničari s 33 posto. Tufekčić tvrdi

da je "Hidrogradnja" dovedena do propasti kako bi Vlada FBiH naplatila velike dugove od Iraka i Libije i to ostavila na svojim računima, a ne, kao što bi trebalo, dala firmi i radnicima. Ističe da "Hidrogradnja" iz Iraka potražuje 322 miliona dolara, a da iz UN-a kažu da je riječ o 426 miliona dolara, od čega je naplaćeno samo 83 miliona. Tvrdi da su potraživanja iz Libije 30 miliona dolara te da je tamo i mehanizacija za koju ističe da se već tamo prodaje.

Zijad Fazlagić, stečajni upravnik "Hidrogradnje", u petak je

isključio telefon i nije bio dostupan za izjave, ali je prije toga za N1 rekao da su pripadnici SIPA u "Hidrogradnji" bili zbog "nekih informacija o poslovanju".

"Mislim da su to uobičajene stvari koje se pribavljaju o preduzećima u stečaju", rekao je Fazlagić.

Vlada FBiH je u aprilu prošle godine dala saglasnost da "Hidrogradnja" ide u stečajni postupak, a prije toga upravna zgrada ove firme prodata je za 11 miliona KM Union banci, kojoj je za otplatu ranije uzetog kredita otišlo 4,5 miliona KM, od ukupnih 7,1 milion KM datih bankama po osnovu dugovanja. Ostatak je takode na osnovu dugovanja mahom otišao bivšem menadžmentu. Zgradu je ranije željelo kupiti Vijeće ministara BiH za potrebe smještaja državnih agencija i to za procijenjenu vrijednost od 18,2 miliona KM, ali je problem nastao kada se saznalo da je hipoteku na zgradu upisala upravo Union banka i to putem javnog poziva koji je objavljen 17. decembra 2015. godine.

No, prava je priča kako se dijelio novac namijenjen radnicima. Članovi menadžmenta kompanije u prethodnom periodu uredno su tužili "Hidrogradnju" te su, po dobijenim sudskim presudama, upisali hipoteku na zgradu "Hidrogradnje". Tako je 28 bivših direktora, sekretarica, knjigovoda i pravnika ukupno naplatilo oko dva miliona KM. U prosjeku, svako od 28 članova menadžmenta dobio je oko 72.000 KM. Od tih 28 radnika "Hidrogradnje" najviše su naplatili bivši tehnički direktori Elvedin Borovina (165.000 KM), Bakir Arslanagić (167.000 KM), Branimir Mijatović (103.000 KM) i Harun Čatović (101.000 KM), kao i direktor pravnog sektora Sead Talić (115.000 KM). Za pokretanje proizvodnje bilo je namijenjeno tek 200.000 KM, dok je ostalim radnicima, njih oko 600, isplaćeno po 4.000 KM preko bankovnih računa.

Pokušali smo ovim povodom kontaktirati Nermina Džindića, federalnog ministra energije, industrije i rudarstva, ali nismo uspjeli dobiti informaciju.

ČLANOVI MENAĐŽMENTA KOMPANIJE U PRETHODNOM PERIODU UREDNO TUŽILI "HIDROGRADNJU"